

四庫全書

集部

欽定四庫全書

集部

文氏五家集卷一至三

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣王錦

欽定四庫全書

集部八

文氏五家集

總集類

提要

臣等謹案文氏五家集十四卷明長洲文氏四世五人之詩也文洪字功大成化乙酉舉人官涑水教諭著括囊稿詩一卷文一卷其孫徵明著甫田集詩四卷徵明長子彭字壽承官南京國子監博士著博士詩二卷次子嘉

字休承官和州學正著和州詩一卷彭之子
肇祉字基聖官上林苑錄事亦著詩五卷中
惟徵明名最盛其家學之淵源則自洪始之
如靜志居詩話所稱野猿窺落果林蝶戀殘
花自得翻書趣渾忘對客言諸句饒有恬澹
之致徵明詩格不高而意境自能拔俗至彭
嘉肇祉亦能于耳濡目染之餘力承先緒所
謂謝家子弟雖復不端正者亦奕奕有一種

風氣也徵明甫田集已著錄然卷帙相連無
容割裂且除此一集與五家之目亦不合尤
無容改其舊名以五為四故仍並錄之而附
著其互見之故焉乾隆四十五年五月恭校
上

總纂官臣紀昀臣陸錫熊臣孫士毅

總校官臣陸費墀

欽定四庫全書

文氏五家集卷一

明文洪撰

涑水詩集

墅村雜詠五首

避地心方定耽詩癖漸增
閉門防俗客下榻待高僧
遠志雖雲驥生涯尚雪燈
聖恩原曠蕩潦倒愧無能

其二

春雨朝初霽居南似錦沙
野猿窺落果林蝶戀殘花
引水斜疏沼編籬密護家
何憑消永日歌枕讀南華

其三

納涼開北牖防雨覆西垣
自得翻書趣渾忘對客言
徑陰螻蟻集林暝鷓鴣喧
分得清溪水時時灌藥園

其四

楊柳津亭北幽軒瞰碧波
綠鋪雲葉足紅落雨花多
載

鶴湖中放看猿澗底過有時攜短策松下聽山歌

其五

地僻意還便春來物物妍微風翻麥浪淺水浸荷錢林
靜疑塵外山晴落枕前幽情忘不得次第入詩篇

詠泉

噴雪蒸雲不盡頭玉龍飛下碧山秋江湖莫作閒風浪
須向人間早處流

柳枝詞

炎葉寧如荷葉香素締那比葛衣涼人生莫學章臺絮
飛去飛來枉斷腸

對菊

蓐收肅霜威草木咸凋瘁
瞻茲東籬蓂孤芳可人意
迎風散奇芬浥露含幽思
吾生抱孤僻茲焉獨云契
醉誦離騷經間咏柴桑句
外慕苟不羈蕭然有真味

夏月行畦

隔田踈雨浥浮埃信脚郊原意暢哉
桑葉漸稀蠶欲老

菜花都盡蝶空來
農歌時逐車聲起
藜杖遙隨落日回
景物清妍還滿目
臨風欲賦愧無才

送祝先生維清赴召

錦服才看故里遊
又隨嚴詔向神州
依歸誰不歡衿佩
簡注其如切冕旒
紅霧一庭螭陛曉
清風十里桂林秋
乘時早建平湖策
丹鳳重鳴十二樓

五雜俎

五雜俎宮錦袍
往復還挈冰棹
不得已南郭逃

自君之出矣

自君之出矣
鸞鏡護常深
留待君歸日
持將照妾心

題畫

浩浩前山雲盤盤
後山路我欲訪仙源
歸來恐迷誤

杭州感舊

髻角隨親客
武林六街行
樂及芳辰翠
分螺黛三峯曉
花擁笙歌萬戶春
青幙紅欄臨水店
竹輿油笠看山人
十年歷歷重遊事
恍忽前生與後身

南行舟中雜述

露白沙涼月滿空
雁聲歷歷度西風
客程尚與鄉關近
歸夢如何便不同

兀兀蓬窓意不舒
苦無人與寄家書
家人此際應相說
知過錢唐幾日餘

蘭橈束月渡錢唐
萬事辭家已漸忘
惟有老親牽夢寐
宵來三度在高堂

力挽孤舟滄急湍
溪流如箭湧狂瀾
長年為指前頭水

此是南行第一灘

九里瀧

峭壁攢峯一萬重
小舟曲折亂山中
濤飛近渚潮潛應
岸轉迴塘路細通
蔽野瘴雲朝霧黑
帶溪霜葉晚霞紅
書生小濟心私慶
十日蒲帆逐順風

烏石灘

百川過雨灘聲亂
渺渺雙篷滌急流
山氣蒸雲斜走馬
浪花飛雪倒行舟
參差漁網斜陽外
零落人家古渡頭

望望三衢知不遠
爛柯山下即龍丘

寄家書

緘書千里托鱗鴻
雲路漫漫歎未通
為報白頭親莫念
平安還與在家同

自警

人生受斯理厥初本無偽
一物為之役聖賢始縣異
惟聖乃克全浩浩莫匪天
弗假思與勉所欲咸自然
衆心緣汨沒斯理未純一
惟學能反之茲焉造其極
反之曰

金史卷一百一十五
卷一
伊何亦曰慎其獨日用亦云糾罔俾有纖惡一念隱以
微淵然人靡知而我於斯時必謹察其幾暗室屋漏中
神明常在側翼翼深自閑天理何曾息

畫景

尺素山千頃雲多路更深人行巢鶴磴寺接掛猿林雨
過朝添澗霞生晚護岑江南舊風景時得畫中尋

雪畫

雲亘長天雪滿林釣魚人去已黃昏分明一段山陰意

底事高人不出門

宛轉歌

宛轉復宛轉宛轉情無斷
郎情似車輪妾情似香篆
車停輪亦歇香盡篆亦滅
郎情與妾情宛轉何時輟

羅敷行

采桑怕歸遲使君前致詞
君詞何綢繆不顧妾蠶飢
君將金買心妾將金比身
君金可柔淤妾心亦漂淪
妾夫本有婦君婦亦有夫
使君當自思無事挑羅敷

書鎧

小小銀缸短短檠紙屏風定煖浮馨春花一穗吐金粟
秋水半泓涵素星致用不宜筵上舞第功應廢案頭螢
他時肯作牆根棄傳與兒曹照一經

倦繡圖

簇得芙蓉兩朵金倚牀無語又沉吟玉奴都不知人事
抵死相催下幾針

還鄉

非關張翰憶鱸魚不為陶潛念菊籬底事歸心急於箭
雙親門巷立多時

寄友

書劍飄零故舊疎離懷憾憾竟何如江山不隔還家夢
魚雁難通寄友書共館晝閒花落後柳塘風軟燕來初
楚雲吳樹元相接靜倚江樓嘆索居

睡起

寂寞掩林扉東風晝方永睡起落紅多斜陽半樓影

春暮

垂楊覆井欄新筍漸成竿數日無人到薔薇獨自看

病目

患目強難開冥心斲死灰併除青白障寧計晦明催默
誦新成句愁間舊舉杯近來添佛念十日面如來

下第回經丹陽

京塵漠漠染欄衫依舊書生跨蹇還防虎夜投淳化鎮
聽雞朝度句容關僕夫已熟驅馳事道路爭看困悴顏

六悞科塲垂廿載髻毛那得不斑斑

春日郊外書所見

麥熟菜黃三月天村姑塗抹鬪嫣然
齒紅裙子東風颭
小立沙頭喚渡船

蠶月人家戶若封小姑隨嫂入桑中
蓬頭赤腳無顏色
只有裙兒映水紅

漁父

睡鷗个个鋪明沙清商一曲鳴蒹葭
垂綸似忙還似暇

意豈果在尋魚蝦魚多還將換村酒煖酒烹魚坐船首
醺醺囑婦早曝網嗚嗚命兒急擊缶儂家此樂真自然
何必人世無神仙全家不知離別苦年年歲歲江湖邊

村居 六言

村前村後放犢溪北溪南捕魚
案頭積高士傳門前迎
長者車

秋夜 六言

楊柳搖階月色梧桐落井秋聲
報道銅壺漏轉先生酒

醒詩成

香奩三首

倦倚雲屏意暗傷
錦衾瑤鴨靜吹香
如何花外濺濺漏
才到孤眠便覺長

半幅花牋著樣裁
丁寧緘與玉奴來
就中盡寫難言事
莫向人前便展開

龜甲屏風繞絳籠
夜深涼冷與誰同
愁來恨殺歸寧事
斷盡人腸是此風

金史卷一百一十五
卷一
鵲鵲

碧池露冷秋荷顚鵲鵲兩兩迎風戲相呼相喚不能違
欲去不去情依依
莫春郊行

樹裏人家半露牆郊原春盡有餘芳偶然聞鳥扶藜出
不覺沿流去路長一抹微風柳吹絮滿村晴日麥登場
何時解脫人間事來結山翁作醉鄉

次韻丁雪坡游仙

玉龍觀前花亂開飛瓊邀我相追陪
翠管聲翻羽衣曲
綠醅香瀉流霞杯
試騎長鯨入海舞
忽有孤鶴橫江來
清風吹夢寂無語
弱流渺渺空徘徊

句容道中

拂面風埃已句容
依然風景去時同
不堪一種秋池上
寂寞芙蓉尚未紅

宿白土

僕夫倦行役
迫暮停征輪
解鞍憇村墅
言茲息艱辛
藝

新代明燭敷草為重茵呼童買村酎滌我胸中塵酒薄
心不怡欲醉渾無因傷哉東野蹇痛矣范叔貧亦知有
命在念此白髮親

出白土

晨興即長路曙色喜初分白土家家店青山處處墳虎
踪當路見雞唱隔林聞遊子心中事悠然嶺上雲

漁父

一葦橫江蒞船頭雪正飛魚租輸未足不是暮忘歸

訪徐尚容

潞溪溪上草堂閒
雲樹千重杳藹間
欲向梅南問消息
東風吹我過西山

阻雨再疊前韻

偶尋君至得身閒
十載情懷一笑間
天意不教人遽別
斜風吹雨暗前山

無題集句四首

一別音容兩渺茫
羅幃空度九秋霜
日高睡起無情思

金瓶梅詞話卷一
萬轉千回嬾下牀

子規枝上月三更展轉紗帷睡不成
添得情懷無是處
背燈愁泣到天明

夜合花開香滿庭
酒醒還醉醉還醒
一痕心事難消遣
卧看牽牛織女星

山色滿樓人未歸
淚痕空濕嫁時衣
何由得似雙鸂鶒
只過寒塘亦並飛

毘陵道中

昨日嘆辭家今日行更遠因思明日程忡懷愈難遣

志喜

桂子吹丹香滿身姓名今日薦書新
幸酬老大青雲志粗慰衰遲白髮親
霧歛南山通隱豹水生北渚縱窮鱗
廿年一舉非容易豈是看花得意人

丹徒鎮冰合陸行至江口

曉起敲冰促去程舟膠無計達江城
功名何物能驅我冒冷丹徒鎮上行

北行道中述懷

又攜憔悴上京華
行李三千北望賒
親老悞將身許國
歲殘時有夢還家
聲催落木風添信
陰結層空雪弄花
客緒慙慙排不得
坐籠紗帽自煎茶

宿遷夜行

雲籠新月映青霄
坐啓孤蓬促去橈
積雪滿川風色緊
旅懷添得是今宵

獻縣早發

曉起驅車涉大荒
離離雲月照車廂
酒醒怪得寒侵骨
起視征衫滿袖霜

客中思親

帝京逢歲晏
南望憶親居
負矣冬溫被
懷哉暮倚閭
漫多歸去夢
頻閱寄來書
說著農家樂
從前悔業儒

中乙榜不就南歸

喜承恩詔解儒官
正以為師自古難
山斗怕孤諸子望
雪螢未遣舊氊寒
半擔行李和書束
千里江山引劍看

獨有懷君心未已紫雲西北是金鑾

呂梁洪

經旬病體怕支風兀坐蓬窻若夢中
慌忽耳邊奔萬馬扁舟橫渡呂梁洪

渡江

渺渺寒江駕短篷斑斑頭髮尚西東
淹流客況兼逢雨輕薄征衫不受風
萬里長空沒鷗鷺一泓秋水老芙蓉
十年書劍成何事羨殺磯頭把釣翁

先府君復土

手培新土漸成墳誰念傷哉子路貧三釜空懷他日恨
一衾才掩沒時身精英不斷惟餘夢禮限難踰尚作人
三尺青松和露種百年腸斷紙錢春

除夕

風物蕭條一歲殘忍將衰病對椒盤蹉跎尚握班超筆
慷慨時看貢禹冠梅漸有香因得煖竹能無恙為禁寒
一杯莫道貧非幸且得團圓共笑歡

高郵湖

參差城郭是高郵望望平湖不盡頭
初日蒼涼波底上閒雲零亂水心浮
平分烟樹藏村塢並立鷗鷺傍釣舟
一笑乘風馳百里片帆回首失揚州

宿汶上

汶上經過薄暮天空村雞犬亦蕭然
編茆作屋才容膝築土為牆不及肩
老少團圞依壞坑牛羊成隊下荒阡
旋持藁秸炊黃黍斜日西風一縷烟

言懷

十年書劍屬飄零
憔悴青衫太學生
有子策名粗畢志
衰年隨計未忘情
風塵欺鬢蕭蕭短
雨雪侵衣漠漠輕
爭似歸來故鄉好
西山自買薄田耕

友人陳君竹圃

主人自種千頭竹
手洗長竿結為屋
層層蒼翠作深幃
瑟瑟清風響寒玉
湘雲一片蔽晴空
卓午猶疑未晨旭
炎炎赤日燒空時
涼陰四布無纖燠
也知高興比王猷

終日臨軒面晴綠閉戶常令俗駕回掃榻時延清隱宿
豈惟至貴等封侯得此兼令人不俗世塵不到意殊清
肯厭常貧食無肉

過易水

馬頭沙草入秋枯易水蕭蕭恨有餘烈士聲名在天地
伯圖消歇有丘墟千年呂政辜難追當日燕丹計亦疎
不盡書生懷古意西風斜日倍唏噓

寄林時官永嘉

雨雪天寒雁北飛
越南燕北渺天涯
可憐薄祿驅人得
兒客南窮父北陞

題畫六言

籠柳輕煙不斷催
花細雨無多古徑
深藏蔓草小堂遙
隔松蘿

寄舅父國子張先生

碧梧飛葉動秋風
回首江南意萬重
斗祿驅馳疎骨肉
百憂荏苒變形容
囊無長物貧依舊
案有清鐫病亦封

望望渭陽情不極
幾回談笑夢中逢

秋日思歸

庭樹蕭蕭忽報秋
離懷拍塞思悠悠
敝廬南國何人守
薄祿窮燕竟歲留
馬上黃塵深汗面
樽前白髮已蒙頭
西風吹醒功名夢
一片閒情繞故丘

歸得園二十八詠

歸來堂

久客念當歸
何待秋風生
黃花有佳色
青山無俗情
是

間有真樂悠悠空令名

今是亭

履道心神融馳勞性真澗是非兩悠悠大夢誰當覺陶
翁悟已久疇須問今昨

晨光樓

人生亦旦暮一往不可追晨興陟層樓光景已熙熙感
此惜遲暮悠然千載思

三荒逕

金匱要略卷一
種竹滿東原清陰接隣壤三徑未全荒秋風吹灌莽不
容車馬過幽人自來往

菊存坡

杪秋風氣肅繁霜被原野采采黃金花盈盈尚堪把會
心即欣然何必東籬下

自酌軒

牀頭酒新篲南軒花初灼開軒對新花引酒自斟酌無
人不妨閒客至亦不惡

寄傲窓

窓前有涼風道上有車馬渺渺塵埃中何似南軒下未
問羲皇初自是遺形者

容膝窩

人生百年內所適但秋毫顧此易足形而以物自勞一
安等千厦始識柴桑高

日涉園

芳園僅十畝頻策信吏猶嘉蔬日夕繁綠陰行已稠豈

曰勤四體亦復散襟憂

常關門

青苔滿蘿逕白雲護雙扉
非關習性懶地偏人迹稀
春風翠簾捲惟有燕來歸

流憩坳

肆目山之坳意行還自息
萬里白雲思悠然寄輕策
天地寂寥中此意無人識

出雲岫

古岫寒冥冥春風雲靡靡日出行雨歸日暮隨風起彼
美山中人無心任流止

知還巢

鴻鵠萬里心秋風迅征翰何如巢栖鳥朝翔暮知還彼
狂志四海此借一枝安

盤桓處

歲晏空山寂端居寡過逢衆卉紛已息悠然撫孤松澆
世不可羣聊復托高蹤

息交齋

脫簪謝朝行泉石任蕭散非關世我違自覺交游嬾稍
得喧煩隔不嫌輪鞅斷

情話館

浮世白日短青春曾幾何言念親故懼顧景共婆婆倘
此畢歲年所得良已多

琴書室

讀書娛道心非以祿仕謀瑤琴無俗調聊以寫煩憂彼

窮方求知寧復知天遊

西疇舍

綠野佳雨霽芳條青鳥鳴東作念良日西疇課農耕丘園無俗事隴畝有閒情

巾車岡

崇岡帶平壤時時巾我車春晴涉芳陌秋晚歷荒墟於焉有真適終老不願餘

棹舟溪

清谿不可唾時時載輕舟
鮮飈漾文裾弱槳依寒流
禽魚共翔泳日晚更夷猶

窈窕壑

平生謝幼興寄情在一壑
豈無治世才不易閒居樂
酒醒山月高松風自迴薄

崎嶇丘

楊侯不去鄉端思釣遊處
一丘何足多當年共容與
魚鳥亦會心良能供暇豫

欣欣林

膏雨潤芳原欣欣樹如沐物化無終窮春風自清淑還
似端居人道榮生意足

涓涓泉

新流瀨寒谷涓涓湜而沚不供濯文纓聊堪洗塵耳悠
哉川上情誰應會深旨

植杖坪

閒居鮮世營良辰每孤往一笑自耘耔芳坪堪植杖豈

惟服農勤亦足寄遐想

舒嘯閣

登高發孤嘯聊以寫憂端
松風挾鼓吹疑是鹿門山
孫登不復生勝踐屬高閒

清流閣

清風在閣上流水在閣下
纖塵不復生須眉堪倒寫
日暮聞滄浪知有臨流者

樂天居

榮願有終畢富壽豈人爲彼狂不知天徒爲小兒嗤所
以柴桑翁乘化不復疑

道傍殘碑

夕陽聳肩擁寒沙土蝕苔荒斷亦訛人世直饒金石固
百年風雨亦須磨

古井

改邑何妨舊井存苔花翦翦石欄春輓轡聲裏千年澤
不是郵亭閱過人

漁歌

斜陽詩思繞寒汀
何處秋風款乃聲
水渺蒹葭情不極
錦溪橋下白烟生

村漏

風雨空村人斷行
荒譙寒漏夜冥冥
不須辛苦論長短
正好詩翁醉裏聽

魚

紫萍香暖雨初晴
波漾纖鱗映日明
欲識遊鯈箇中樂

試從濠上問莊生

文氏五家集卷一

欽定四庫全書

文氏五家集卷二

明文洪撰

涑水文集

易水弔荆軻賦

先生執教於涑惟古是懷于游于觀城郭之隈實惟易
水經之遂放舟而徘徊嗚呼星移物換遺事不消蒼波
激寒北風蕭蕭古人之悲今人之嘲也嗟祖龍之雄驚

今將六邦而一噬今夕納此城今旦已屠彼之地雖縱
橫之異策今咸坐盡於一弊何子丹之狂今又佐以卿
之昧將科頭而編須今刃虢虎於一試胡為其智之剽
今乃謀人之太易於是白氣貫蜺太陽不輝圖歛也縮
壯士遂西至於負劒一拔身膏異庭豈燕秦之德殊致
而其力之異形哉譬之兩獸相值雖必鬪於卒然之頃
然其最輕而勞者必先殞稍重以逸者猶且生也徒使
見者膽喪聞者氣折弔卿九原千霜未歇而況素耳其

所由今目其所涉者乎彼如責以大義譏其小諒固理
之當予亦同狀靜而思之死非可嗜命豈再捐卿則失
矣而豈無加於人焉者乎曷不觀諸無才無德痴頑老
子彼安知此邪又不觀諸賣國賊璨死其宜矣彼豈求
是邪若為友以死者亦禮經之所許也但死而得其所
者斯太山之重而至難耳弔罷情豁命駕歸只涼颼四
起落照在水

遊黃金臺故址記

余少讀書見古賢君哲士之遇合有遺跡在天下未嘗
不思得以即其地而慰吾懷也成化乙未以乙榜授易
州涑水教諭涑水古燕趙之衝燕昭求士黃金臺在焉
思一登而弔之未暇也戊戌之夏海虞桑民懌授泰和
訓導將自京師赴潁上乃紆道訪余於涑留數日因談邑
中古跡謂斯臺之遊不可負也於是戒僕馬載酒肴偕
民懌往臺距城若干里有浮圖為識而臺之故址莫考
焉訪於里人指土壠以為是乃相與披榛莽循蹊徑登

而覽之但見喬林茂草荒煙落日而已因慨念當時之事雖出戰國縱橫之習而有戾於聖賢出處之義然而昭王下士之誠足以訓天下之君而郭隗之言亦足以激天下之士去今數千載人境俱泯而其名不與俱亡豈幸而致哉酒酣民懌援筆為賦鏗訇瀚漫與茲地稱余欲繼而未能乃記其事而系之歌歌曰國求士兮無金與臺士遠千里兮其誰能來燕王郭子兮今何在吾與子兮空銜杯以徘徊

龍游從學記

景泰某年舅氏張宗德先生以乙榜教諭衢之龍游於時洪方以家庭子執經授業而先生駕言于邁洪念不能往從垂成之業無所於卒將遂棄而他圖先生不可言於家君曰若子猶吾子也其學之成與否吾均責焉此行遂持以去至止於茲三十有幾月矣披摘吟誦弗敢自佚而游道日廣從朋去來不能無所適而中心有不釋然者則以大人垂白而弱弟穉耄未更練傍無強近

親戚仰給無所他時榮顯不可逆計而一時旨甘之奉或缺焉則洪不能辭罪矣深居歎恨或中宵淚零不能已已友人胡彥超知余所嬰每加慰洪曰子之志善矣而不必以是自歉也聞之先師曰父母在不遠遊豈不以定省不可缺而滄漚之奉非可假人邪然在當時四方之士違其親學者豈少哉言游吳人至輕千里而學於魯當其時其親在與否雖不可知而諸子之近而非魯人者豈皆無親哉未聞夫子之拒之也使士當學而

不當從師遠遊則夫子當拒其來矣子游子之鄉人也固子之所當法也龍游視吳與吳之視魯何如哉子惟自奮以取功名求所謂孝之大者可也定省之業昔人所重然固小之為道也子亦求其大矣乎余聞之躍然曰命我矣因筆而為之記

送別駕鄒君之任杭州序

成化某年月詔以涑水令安福鄒君某同知杭州府事於是君辭涑赴杭行有日矣涑之士民不忍其去也謀

所以致其情於別離繾綣之間乃相率播之聲詩誦君
之勲德而推叙於余余典教於茲得於表率之餘知君
為深而以文字為職有不得辭而又有樂為君道者君
始以高科起家尹劇邑績最升朝拜監察御史激揚振
肅譽籍籍起班行中俄以註誤左遷涑陽涑陽鄙小邑
而近臨邊徼民貧而悍寇盜衝斥又當輦轂之衝近習
中貴與夫將校往返徵索無虛日前政視如束濕君至
以禮自律以法繩下而深惻民隱未嘗以謫宦自佚於

是政平訟理道化大行民方賴之而君以遷去不得終
惠乎淒淒之民有遺望焉豈不以不能久任乎君為宰
銓衡者責也而不知其間有不可已者君之才非可以
一邑淹也蓋君為邑而邑理在諫而諫行今茲佐郡亦
推行而已又當無不治者吾知自佐而守由守而藩臬
進而台司皆將自此而升也一郡一邑果足以淹君乎
哉是為叙

送顧彥昌北還叙

余雅性喜交游方鼓篋庠校弗克求友於天下或時聞人道天下之士有類君子者未嘗不識於心比歲獻藝春闈識顧君彥昌焉入吾意著吾耳目有足信其為君子也旣而余辭乙榜歸吳不得與之游從方竊念之乃明年冬彥昌自京師來吳省其舅氏王時勉先生先生吾姻家也因得周旋其間接其論言挹其容儀端直清修卓然君子也自冬徂春凡數閱月其間良辰勝叙必偕二三佳友歷吳中諸山而游焉或譙歌遨遊或徘徊

弔古豪談博辨意氣慨然初不計功名之得喪身世之窮達也余乃益信其所存所養有非目前流輩所及而區區亦益自慶其取友之不妄未幾將去吳而歸而吳之人士與之游者不忍其睽而去也謀所以贈處之義而時勉徵言於余余告之曰古之君子誦詩讀書而上交千古尊賢好善而下交一世蓋欲萃天下之善會天下之理其理會於心而用無不周善萃於身而體無不具體具用周而才德之出衆者吾見亦罕矣若彥昌往

還湖海而半交天下之士則亦有以就其德不讓乎古
之君子矣豈易得哉以不易得之人而處於易得用之
時吾見其飛騰而去不終於此棲遲也彥昌行矣余亦
有事進取明當遲余於青雲之遠斯言其左契乎

明故昭信校尉蘇州衛百戶夏宗源墓誌銘

昭信校尉蘇州衛百戶夏君宗源以成化丁亥八月七
日卒於家鄉之大夫士暨衛所府邑官僚相繼往弔巷
隘不能容車馬行道之人咸惜之曰非是人曷克臻此

君之先府君與余家君同娶於張余於君為從母弟君少孤與余同學於外氏時外大父升遠翁撫愛特至恒勗余二人曰汝輩當交勉期並樹立母為有先後也既而君以父蔭補官大植門戶名聞赫然而余在困厄者幾二十載甫及領薦而君又已奄忽棄去其情有足悲者及葬君之子禮持狀踵門泣且請曰知先人者無踰叔父藉不朽之言以重先人幸莫大焉嗚呼吾忍銘吾兄之墓耶又忍不有言以慰吾兄耶按狀君諱源字宗

源姓夏氏世為光州巨族曾大父福仕勝國為參政入
國朝從太祖高皇帝戰累有功授百戶大父瑀襲其職
遂官於蘇父鐸早卒君生九年而孤甫十有六而官咸
以少而易之而君卓卓自立有所區畫偉然如老成人
及長益更練有識衛有難重事率君處分君刃迎節解
無絲髮壅滯遇事不可為衆束手無措君至莫不釋然
性至孝以父早亡母氏厲節撫已而養皆弗逮言及輒
垂泣不已而事祖母極謹尤謹於祭祀其治家嚴而不

苛與人交和而重義又能赴人緩急平生藥疾槿死飯
饑燠寒常若不及景泰間歲儉有租數百斛悉捐弗取
雅喜接賢士大夫雖急遽未嘗厭怠而嘉儀令辭有足
動人者故一時名臣碩德往往樂與之交嘗遣禮從余
遊所以望之者甚至禮亦修謹嗜學學成而君逝矣惜
哉君生永樂壬寅二月十日享年四十有六娶阮氏蘇
州衛千戶武略將軍讓之女生禮及禎禮襲其官娶喻
氏禎娶某氏女二長適左所千戶唐弘次適右所千戶

闔某子謹卒之又明年己丑十二月庚申葬吳縣支硎
山新塋銘曰

孰不有生維立則成熟不有官維克之榮吁嗟夏侯德
音孔宏既操之貞亦志之行弗隕厥聲胡弗永其齡方
壯而傾有鬱支硎是維佳城尚安于茲以永無驚

趙公世本墓誌銘

余姻趙公世本既卒其孤謙將治葬以余知其父行之
詳也泣請銘墓不獲辭遂叙而銘之公諱興祖世本字

也姓趙氏世為蘇之長洲人自高曾而下皆晦迹弗耀
大父某始以才謂薦起仕國初為池州青陽丞父原潏
母顧氏公自幼能砥礪志行初原潏從青陽君宦游青
陽卒貧不能歸留金陵久之既而挈帑還業將有營立
未遂而亡公方髫鬢傍無強近親戚孑然無所顧藉遂
刻力事生握勞操苦不數歲遂大植門戶而其持身終
始一以儉朴雖故楮弊幃必緝而藏之旋出以副所需
莫不適用生平恒以弗逮養親為憾四時莫獻必誠必

潔而事繼母陸尤極孝敬御宗黨必以恩而能以義自持嘗誨諸子曰治身治家皆當以勤儉孝弟為本吾幼孤弗暇從學而先緒賴不墜者事此耳又以家世播遷之餘門祚衰薄思有以振青陽之業遣孫璫補郡庠弟子員凡所以教督策厲者無所不用其至晚年以家付子若孫徜徉詩酒間佳時勝日必命賓友具酒肴遨遊山水間悠然自適蓋不知其老而耄及之也嗚呼達哉成化丙戌十二月乙卯以疾卒距其生洪武辛未十二

月丁亥享年七十有七配同郡徐氏子男三人長謙娶
陸氏次讓娶周氏又次誠娶葉氏女三人適黃以安陳
智顧庠孫男四璠璿璵璉女一曾孫男三女二于成化
戊子正月二十四日葬吳縣至德鄉仰天山之原銘曰
既儉亦勤植維其門孝弟恂恂康維其身匪康則身貽
其子孫尚千百年斯其永存

文氏五家集卷二

欽定四庫全書

文氏五家集卷三

明 文徵明 撰

太史詩集

五言古詩

飲子畏小樓

今日解馳逐投閒傍高廬君家在臯橋誼闌井市區何
以掩市聲充樓古今書左陳四五冊右傾三兩壺我飲

良有限伴子聊相娛與子故深密奔忙坐濶疎旬月一
會面意勤情有餘蒼煙薄城首振袖復躊躇

寂夜一首 效子建

中宵聞零雨撫枕起躊躇昏缸栖素壁流焰照重幃感
此寂無語戚然興我思我思何鬱伊欲舉焚如絲少壯
不待老功名須及時男兒不仗劍亦須建雲旗三十尚
隨人奚以操筆為文章可腴道曾不療寒饑仰屋媿塵
浮俯睽影依依人生良有命何獨令心悲心悲髮為白

失脚令身危欲為絕世行道遠恐不支世情忌檢飭歛
目俟其疲誰能七尺身受此千變機役役亦徒爾多憂
得無癡惟應慎厥躬古人以為期

題畫

瑤溪涵素秋夜雨洗郊陌漁梁不通市悠然屏塵跡道
人燕坐中平坡淨於席疎樹不遮山斜陽亂寒碧

為陳子復畫扇戲題

長松蔭高原虛亭寫清泚重重夕陽山忽墮清談裏吾

生溪壑心苦受塵氛累時從筆墨間塗抹聊爾耳亦知
不療饑性僻殊事此有如魚吹沫不自知所以世人不
相諒調笑呼畫史紛然各有須縑素盈案几鞮材真足
厭研吮良自恥經旬一執筆累歲不盈紙交遊怪逋慢
往往遭怒訾豈知書生為未可俗工擬五日畫一石十
日畫一水雖無王宰能此例自可倚陳君乃何人亦自
顧庸鄙一扇五更年此負真緩矣吾方懼獲怒君顧得
之喜一笑題謝君賢於二三子

秋日將至金陵舟泊慧山同諸友汲泉煮茗喜而
有作

少時閱茶經水品謂能記如何百里間慧泉曾未試空
餘裹茗興十載勞夢寐秋風吹扁舟曉及山前寺始尋
琴筑聲旋見珠顥泌龍唇雪漬薄月沼玉渟泗乳腹信
坡言圓方亦隨地不論味如何清徹亦云異俯窺鑑須
眉下掬走童稚高情殊未已紛然各攜器昔聞李衛公
千里曾驛致好奇雖自篤那可辨真偽吾來良已晚手

致不煩使袖中有先春活火還手熾吾生不飲酒亦自得茗醉雖非古易牙其理可尋譬向來所曾嘗虎阜出其次行當酌中冷一驗逋翁智

九月念八日夜夢中作

碧桐已蕭蕭水谷流泱泱獨行蒼莽間犬吠人跡絕旭日穿樹林青煙忽消滅時看殿巖風吹落松上雪

除夕有感

姁姁小兒語耿耿燈燭明空齋薄羞設言餞歲將行人

行有歸期歲行無復程誰云無復程行與來歲迎不嫌
去日遠端愁來歲併歲亦何去來送迎自人情人生良
有限七十云已盈後此未可知今已半踐更詩書苦無
驗冉冉白髮生富貴非不樂功業亦所榮少壯不相待
老大徒心驚安得柔脆軀與此浮世爭聖賢豈常在古
人崇令名感歎寧有益濁酒還自傾

新正三日西齋對酒示陳淳

乙丑

西齋掩晴晝有客過我遊攬衣起肅客一笑散清愁新

聲麗屋角碧草被高丘涉春始三辰已覺氣變柔行看
換朱白清陰覆牆頭青春來何易白日去何邁願言惜
白日努力繼前修芳樽浮濁醪短案登嘉羞客情方眷
眷我意亦綢繆綢繆何所為薄言氣相投顧茲一日長
屈置門生儔淺薄晚無聞奚以應子求三年守殘經一
舉不能謀豈曰屬時命要是業未優業至名自成德淵
心日休勲猷貴乘時少壯靡遲留德荒學不講吾與子
同憂

題畫贈許國用

窮巷十日雨泥深斷來客西齋午夢破定然識高屐啓
戶延故人一笑慰乖隔閒窓設香茗短榻散書冊涉筆
寫滄洲居然見泉石春山正沈沈春雨猶霏霏密竹曉
低迷弱雲晚狼籍挾葢緣高岡貌子獨行迹子迹良已
奇吾意無乃劇吾生雅事此亦頗自珍惜願為識者畫
不受俗子迫惟君鑒賞家心嗜口不索吾終不君靳不
索翻自獲君能用君法吾自適吾適當得吾意時知否

欽定四庫全書

文氏五家集
卷三

初未擇偶落好事手謬謂能入格餘人惟和聲遂使虛
名赫雖得知已憐頗為遺者責誰云興致高正坐能事
厄幾欲謝膠鉛就中有深癖我癖君更甚收此顧何益
君言有妙理意自不能釋我畫惜如金君藏慎於壁好
畫與好藏同是為物役

聽竹

虛齋坐深寂涼聲送清美雜佩搖天風孤琴瀉流水尋
聲自何來蒼竿在庭圯泠然如有應聲耳相諾唯竹聲

良已佳吾耳亦清矣誰云聽在竹要識聽由己人清比
脩竹竹瘦比君子聲入心自通一物聊彼此傍人漫求
聲已在無聲裏不然吾自吾竹亦自竹爾雖日與竹居
終然邈千里請看太始音豈入箏琶耳

陳氏池亭納涼

朱雲釁天漢金烏朗炎曦方夏苦埃鬱言遵芳園嬉息
鞅假南榭褰裳蔭北池微涼度鮮飈淺碧漾寒漪短藻
翻鱗鬣閒渚集鳬鷺流日落翔泳遊心寓篇詞願言領

幽意況復酬心知坐撫景光寂還憐車馬稀逍遙極瞻
諷旦晝不知疲疇能均涼燠無為居所移

小齋盆蘭一幹數花山谷所謂蕙也初秋忽抽數
幹芬馥可愛因與次明道復賞而賦之

時雨祛殘暑涼颼集華軒春徂衆芳歇晚蕙抽瑤根重
茲蘭之屬不與凡卉羣離離水蒼佩肅肅紫霞紳耿耿
孤榻畔燕對如高人啓扉得良友列紫羅清罇於焉撫
靈植一笑滌塵煩微風南牖來濃馥散氤氲有時參鼻

觀卽之已無存譬彼孤潔士可望不可親如何庭階近
有此幽谷芬相忘餘洌中漸久不復聞魯哲日已遠楚
纍亦沈淪無能被雅操且復酹芳魂

感興一首

婉婉歲年謝霜雪淒以繁崇寒集枯條朝華不復存幽
人春遲暮靜息藏晏溫春風日夕至吹綠牆下根氣機
無代謝焉知松檜尊

歲暮雪晴山齋肆目偶閱謝臯羽詩窮冬疑有雨

一雪却成晴喜其精妙因行為韻賦小詩十章

歲晏羣芳息枯條鳴北風層陰結黯靄朔雪飛長空玄
冥肅景象物化歸終窮妍華肇伊始冉冉收春功

其二

積雪縞晴晝離離見高松睠茲歲寒枝不復知春冬旭
光時明滅奄忽浮雲蹤塵心不能戢歲晏徒忡忡

其三

朝光射晴綺飛翼炫瑤姿微風吹竹藪文玉紛差差霜

草行已繁冰谷流寒漸玄機抱終始逝矣夫何疑

其四

夜寒拂衾稠曉色明牕牖有客從叩門稚子方擁帚玉梅已敷英寒香在纖手一樽疇與同自入無何有

其五

空庭集饑鳥景色入寒沍濃陰釀朔雪松石積縞素玉顏不堅好日出四簷雨薄晚北風微幽人啓朱戶

其六

朔吹號枯藤日暮殊未息居人事塞向鷺鳥厲高翼不知夜來雪庭戶皓已積來麥端可期三白已兆一

其七

陽卉不復腓研沼冰初結雲日弄寒姿晶光互明滅雙扉風自掩陋巷人跡絕庭鳥忽自飛蒼松落殘雪

其八

初旭射茆簷枯藁戀寒雀睡起無餘聲風簾時自約展冊娛道言樽酒獨斟酌無人不妨閒客至亦不却

其九

擁寒不出戶焚香娛燕清朝日照盂盎浮光上虛楹修
竹不受風時時蒼玉鳴閒情溢眉宇酒醒詩亦成

其十

殘雪不蔽瓦斷溜收寒聲晨威淒以嚴雲日麗新晴凌
風振藁薄枯卉不復榮年光屬歸歛慘淡有餘清

春興二首

春陽轉芳序淑景麗清嘉晨風扇微和百鳥鳴周遮繁

欽定四庫全書

文氏五家集
卷三

九

陰泣清露朱英耀朝華端居媿物化起擷崇蘭葩貞芬
媚幽獨常恐委泥沙青青陌上草日夕遍天涯

其二

妍英弄芳意柳色含春姿物華浩無涘
飴蕩東風吹東風日以熙草色日以滋
青春萬里道遊子有所思浮雲漏白日
宿露朝已晞攀條惜婉麗忽得瑛瓊枝
芳悰未有托暮景已西馳菁華難復恃
結皓聊自怡

支硎山

平巖疊蒼翠云是支硎山支公今何在白日空孱顏
灌莽翳深壑有泉覆其間委流界中道足底聞潺湲悠悠
遺世人曾此寄高閒芳蹤藐難屬古字蝕苔斑

題畫贈皇甫太守

斜陽帶迴堰秋影落寒潭微風薄高樹巖花落毵毵何
以消宴坐溪聲答高談虛闌寫空馥疎簾搖夕嵐君今
有公事萬里策征驂還應燕寢地展卷憶江南

古風贈鄭先生

欽定四庫全書

卷三
五言集

紫蘭生谷中英英茁瓊芽芳根抱幽獨不知桃李花桃李當春時明麗烘朝霞物化歸有盡穠艷無常華風雨日夕至零落空泥沙回看幽谷藪奕葉含芬葩旁滋百畝蕙留夷均揭車申椒雜蘅芷百馥紛交加終資扈紉收豈久在天涯胡猶困資萊日暮令人嗟被服平生懷欲往道匪遐願言從明潔卒歲保貞嘉

二月

二月春尚早青泥沒蘭芽東風日夜急吹雨作瑤花玉

龍壓層簷素月流寒沙香紅逐飛鞚令人憶東華

題畫

高磴落寒泉窮巖帶疎樹山深無車馬獨有幽人度幽人何所從白雲最深處出山不知遙顧見雲間路

三月旣望同吳次明蔡九遠陳道復湯子重王履約履仁汎舟石湖遂登治平以天朗氣清惠風和暢為韻分得朗字

良期每多違佳節悵虛往薄言城西遊餘春遲幽賞日

色漾漣漪天光發融朗清吹飄文裾瑤湍激蘭漿寄懷
涉清川平目眺遐壤晴霏動遙岑青煙散脩莽亞竹孤
卉明隔木春禽響及此單袂成聊寄臨流想

先友詩并序

徵明
生晚且賤弗獲承事海內先達然以先君之故
竊嘗接識一二比來相次淪謝追思興慨各賦一詩
命曰先友不敢自托於諸公也

太僕李公

應禎

太僕在三舍抗言拒刑臣

公在太學中官牛玉延教子公正言拒之

平生

強執志已究未達身十年更外制耿挺標清真矯矯孤
飛鴻翹翹一角麟卿監晚回翔白髮已盈巾故國有佳
山長岐多風塵終然絕俗姿逸去疇能馴

參政陸公容

陸公婁東鳳少小已翱翔

公少與張滄洲泰陸靜逸鉞齊名時稱婁東三鳳

耿

耿文莊公識公在班行職方振風采抗疏扼羣璫章程
在司馬至今有耿光名隆毀斯來讒構伺其傍參藩亦

晚達竟為讐者傷清風不終泯遺書滿緹紉

定山莊公 景

定山古通儒學道希聖賢古義與時違歛息責園田黃
花媚幽徑白鳥泳清川悠悠青山適一往三十年高羅
弗為求欲致無由緣非無濟世心亦有清廟篇惜哉用
違材零落成棄捐

文定吳公 寬

有偉延陵公居然古明德道義周一身文章可華國悠

悠明堂思允矣清廟瑟惜哉晚登庸位用時未極還能
敦薄夫坐亦消讒慝德淵物為遷曾誰覩聲色聖賢不
復生斯人重吾憶

禮侍謝公鐸

巖巖天台山下有幽貞士咀英擷芳鮮燦然散霞綺早
歲登延閣回翔石渠裏壁雍育羣材金匱抽青史雖復
恩眷殊不為纓組累方巖有書堂歸來還秉耒屢召不
終淹誰應會深旨

處士沈公周

東南有一士蘭帶芙蓉裳瑤珠雜瑤玕皎然明月光不
隨鳴鳳下甘與黃鵠翔秋風自寥廓羅網漫高張采芳
涉秋苑看雲撫層岡不為平生得白首聊徜徉悠悠天
隨子千載永相望

參議王公徽

王公夫如何侃侃古遺直一命青瑣闥慷慨思效職此
身朝闕廷暮已在絕域所期言職伸寧計一身抑丘樊

樂優游天子思舊德陝郊甫旬宣遙歸一何亟松菊媚
幽人鍾山有佳色

太常呂公憲

太常名家子英英蒼玉珎文章足華煥秉志亦堅完禮
曹肅供奉弱冠已騫搏不愛蔭補郎自致青雲端滁山
詠列錦銀臺達糾彈所至必宣秉云胡不終安只應千
首詩終古無能刊

宿任城次九達韻

北風吹古堰長河捲沙白昔聞謫仙人曾作任城客任
城非故樓勝事今尚籍想見天人姿春風岸烏幘落月
伴長庚何處尋醉魄我行後千年空見徂徠碧長笛起
鄰舟夜靜聲裂石不見賀知章悲歌向中夕

鉅野次九遠韻

黃河互迴折青山時隱見行行次鉅野古服猶漢縣空
聞澤旣豬非復禹初甸野色浩無垠忽復春風變春風
不可稽客子行亦倦黃金日以銷轉覺青衫賤雨濁或

膠舟時行眺迴堰驚吹捲平沙河流激飛箭何處望神
京天涯雲一片誰云千里遙去去南風便

無錫道中遇雪夜泊望亭二首

北風吹朔雪飛霰雜零雨孤舟暮不前收帆得沙渚天
垂野陰合日暝江雲吐川原入蕭條林木積縞素寒厖
噤不鳴饑鳥驚還聚舉酒不成懽挑燈時自語飄泊豈
在遠出門即羈旅

其二

長林風怒號天低浦雲黑空村煙火微近渚漁舟集路
暗行跡稀蒼然見寒色野泊不成眠羈魂還惻惻昏燈
黯欲絕歸夢迷咫尺成遠更漏沈川寒聲影息不知積
雪深夜久孤蓬仄

九日遊雙塔院次淵明已酉九日韻

時叙不容淹忽忽寒暑交矧余蒲柳姿望秋已先凋山
林樂閒曠勢途利崇高人性各有適奚但壤與霄爰以
一日歡酬此卒歲勞古來明哲士取材不遺焦銜觴輒

忘世何似栗里陶得酒且復樂安能待來朝

十日遊治平寺再疊前韻

李秋氣未肅鳴禽尚交交澄空霜華薄木葉不盡凋
撫輿陟前岡不覺身已高回視平湖東逸峯聳晴霄但欣
雙目明寧辭一身勞物理會有窮何以心煩焦世情共
擾擾吾樂方陶陶達人悟遷化千載猶一朝

新晴

積雨浮宿潤新晴人意適逍遙竹窓中啼禽破幽寂初

陽動簷瓦殘溜時自滴曲巷行蹟稀苔花繡深壁

五星硯并序

余得古端硯銳首豐下形如覆盆面鏤五星聚奎及
蓬萊三島左右蟠雙螭刻其背令虛鐫東坡製銘一
龜橫出作鼉鼉狀文鏤精緻不知何時物也因命為
五星硯

買市得古硯雅與時製別銳首下微豐刻中面多顯盤
盤覆雕盆斬截古鐵背銘龜巧負周飾螭雙揭層閣

擬蓬居羣星象奎列聚觀驚特奇細玩有餘拙製豈由
常徒材仍出下穴挹毫真有助受水復不竭何為塵市
中簿算幾沒減爰登文字場永厲清重節礪磨應不辭
汗辱庶幾雪吾儕二三子無日不相接管城與玄楮固
自有優劣得君稠人中應是諸子傑幽窓榻無時小圃
吟不輟從今難復離坐置行復挈良充几格翫何但揮
灑設便須襲錦囊勿與儔類褻

人日王氏東園小集

晴颼汎叢條浮陽散修莽良時及初正涉七氣已爽厥
日肇惟人探占喜融朗駕言求友生名園欣獨往折蔬
充朱豈扶藜企高壤陟彼牆下岡寄此天際想被草晨
風和隔竹春禽響

新秋夜坐

斜光暗層樓庭陰乍分暝閒門夕未掩月出虛廡靜明
滅腐草暉參差碧梧影秋至涼風生蛩鳴夜初永撫景
慨多違驚時每深省白髮不待年況此百憂并沈沈市

喧息稍稍栖禽定不知更漏深坐覺衣裳冷仰睇北斗
橫繁星麗光炯牛女寂不言銀河空耿耿

不寐

欹枕數寒更漫漫不能旦天寒雞再號燈昏鼠窺案藥
鑪火已微羣兒睡方鼾清風自何來泠然動虛幔病眼
苦不眠循牀發遐歎人世百年短吾生已強半況此貧
賤軀時為小兒翫一卧五經旬形消髮垂燦神情日以
摧志業交凌亂豈不懷明時流光榻中換平生二三友

雅志在霄漢下壽曾不滿半
逐浮雲散感此念微明悠
悠何足羨明月度孤音霜華滿庭院

題畫二首

稍稍涼颼集依依炎景流
西風吹木葉秋色滿蘋洲
伊人何所懷掇棹自夷猶
青山在蓬底白雲宿船頭
滄波渺然去仰見天漢浮
飛塵暗岐路回首正悠悠

其二

輕浪激迴渚光風汎榮條
青天渺何許中流見仙槁
修

眉落明鏡
蘭帶香雲
飄含情采
芙蓉無那
美人遙



文氏五家集卷三

欽定四庫全書

集部

文氏五家集卷

四至六

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣王錦

欽定四庫全書

文氏五家集卷四

明 文徵明 撰

太史詩集

七言古詩

題友壻王世寶釣勒竹

湘竿淚歇斑不留
縞衣玉豈清而虬
蕭蕭寒月照空影
冉冉白雲生素秋
誰家美人誇雪面
中庭搖佩清霜愁

飛來白鳳何所有玉宇瑟瑟風颼颼古來畫竹誰最優
先宋彭城元薊丘誰翻新格作鉤勒王君一派真其儔
稍從筆底超變相遂能意外資窮搜應以虛心本性在
不使粉節縉塵浮清陰雖改風骨是意足宜於形色求
奇踪豈出漢飛白古意尚有唐雙鉤昔人論書謂心畫
看君畫筆知清修我方有愧文與可君已真如王子猷
高堂對此心悠悠聊書數語遙相投殷勤報我無多謀
雙竹不讓雙瑤球

余畫金焦落照圖吳水部德徵先生寄示二詩題
謝長句

憶昨浮船下揚子平翻渺渺波千里何來雙鳥挾飛樓
璀璨彤煌截濤起夕峰倒墮滿江陰霜樹高浮半空紫
舟人指點落日處凌亂煙光射金綺平生快覩無此奇
却恨歸帆北風駛至今偉蹟在胸中回首登臨心不已
偶然興落尺紙間便欲平吞大江水固知心手不相能
塗抹聊當卧遊爾晴牕舒卷日數回不敢示人聊自喜

水部先生詩有名忽枉瑤篇重稱美漫云家法自湖州
自媿區區何足齒由來題品係名聲何況先生是詩史
君不見當年畫馬曹將軍附名甫集猶不死又不見閻
公自謂起文僞池上俄蒙畫師恥人生固有幸不幸拙
劣何堪古人擬江山千載等陳迹一笑寧須論非是

新荔篇

常熟顧氏自閩中移荔枝數本經歲遂活石田使折
枝驗之翠葉芄芄然不敢信也以示閩人良是因作

新荔篇命壁同賦

錦苞紫膜白雪膚海南生荔天下無鹽蒸密漬失真性
平生所見唯萎枯相傳尤物不離土畏冷那得來三吳
顧家傳來三數株桂身翠幄森森殊遠人無憑未敢信
持問閩士咸驚呼還聞纍然生數子絳綃裹玉分明是
未論香色果如何只說形模已珍美千載空流北客涎
一朝忽落饒夫齒白圖蔡譜漫誇張文飾寧如親目視
飽啗只於鄉里足鮮嘗漸去京師邇不須更作嶺南人

只恐又無天下痛

疑

朝來自訝還自疑事出非常有如此

雖云遠附商船達不謂滋培遂生活始知生物無近遠
故應好事能回斡卉物聊占地氣遷造化竟為人事奪
仙人本是海山姿從此江鄉亦萌蘖由來沃衍說吾鄉
異品珍嘗曾不乏不緣此物便增重無乃人心貴希濶
福山楊梅洞庭柑佳名久已擅東南風情氣味不相下
稱絕今兼荔子三

次韻題子畏所畫黃茆小景

斜日翻波山倒浸晚晴鉤出西南勝絕島雙螺樹色浮
遙天一線鷗飛剩誰剪吳淞尺紙間唐君曾有洞庭山
古藤危磴黃茆渚細草荒宮消夏灣我生無緣空夢墮
三十年来蟻旋磨睡起牕前展畫看恍然垂手磯頭坐
湖山宜雨亦宜晴春色龍葱秋月明知君作畫不是畫
分明詩境但無聲古稱詩畫無彼此以口傳心還應指
從君欲下一轉語何人會吸西江水

遊慧山

憶得新秋慧山路小艦歸來及秋暮東行不負酌泉盟
一笑再理登山屨山中草木漸衰歇依舊靈泉雪流乳
腸胃聊煎肉食腥鬚眉淨洗京塵污雅致仍攜小笕茶
舊遊媿讀南牆句墨痕凌亂猶昨日老衲依稀說前度
三旬才到一何稽一月兩番無乃屢人情嗜好信有偏
至理自知非可諭我生自謂萬緣輕泉石娛人却成痼
那能過此但空歸縱不可留須一屨小奚解事走相從
餅罌預潔提泉具斜陽一抹滯奔程好奇正得舟人怒

回視舟人笑不言就中有理無相苦

寄題瑞州清風亭亭為夏太常仲昭守郡時作黃
應龍追記其事乞詩

瑞州山色照江青瑞州太守風泠泠時移事換太守去
清風自蔭山間亭山亭無塵石齒齒百歲風流人仰止
同鄉博士悵來遲撫景懷賢託文字寫心狀物記當時
我不識亭心已至清規寺左萬松長彷彿與客登崇岡
松聲激耳溪流駛月色灑面梧桐涼清風濯人固自爽

景物快意還相當須知物盡風有歇惟有德在人難忘
瑞人緣德護斯亭我復因亭見典刑亭前千挺琅玕清
亭中之人能寫生此君本無食肉相老守況負清饒名
祇今墨君滿天下清風何獨瑞州城

題石田先生畫

細泉汨汨落澗平蒼煙不動沙洲橫湖亭欲上山滿目
新水浮空春雨晴江南此景誰貌得石田先生最神逸
輕風淡日攄詩情疎樹平臯俱畫筆由来畫品屬詩人

何況王維發興新，胷中爛漫富丘壑。信手塗抹皆天真，
墨痕慘淡發古意。筆力簡遠無纖塵，古人論畫貴氣骨。
先生老筆開嶙峋，近來俗手工摹擬。一圖朝出暮百紙，
先生不辨亦不嗔。自謂適情聊復爾，豈知中有三昧在。
可以意傳非色取，庸工惡札競投集。鳳凰一出山雞靡，
高堂拂曉見滄洲。恍然置我重巖裏，定應奪却造化工。
不然剪取吳淞水，神完意到輕千年。題作古人誰不然。

題廬山圖

余為林師寫丘壑高閒用謝幼興事也而石田丈以
廬山高賦之軼亦賦此

壯哉廬山天下奇瀑流千丈江瀾瀾何人巨筆寫奇秀
歐公昔贈劉君詞蒐玄挾怪轢萬象萬古直與山爭馳
莆田先生山澤姿壯節五老同崔嵬名通仕版偶服吏
癖在泉石終難醫高堂東絹風披披令我掃筆為嶽峙
飛橋細路緣翠壁偃松絕壑臨蒼坻已擬先生謝幼興
故著逸士泉之湄就中有理未可說却被石翁加品題

惟翁自有王維筆謂我解畫歐公詩由來絕唱不可和
況此粉墨那容追祇應披霧見突兀庶此峻拔如吾師
吾師真是劉凝之我視六一無能為凝之不作六一遠
此詩此畫誰當知

天池

碧雲十里山重重舉首忽見蓮花峯晴嵐霏空展蒼壁
午陰匝地搖長松遊人著脚萬松頂蜿蜒細路凌飛筇
不知去地幾千丈乃有寒瀨流琤琮微波吹魚動石脚

金匱山房詩集 卷四
倒影落鏡浮雲容臨流弄玉搖明空水中照見青芙蓉
穹崖壁鐵迸雪乳定出天造非人庸下方春來萬井渴
安得此澤常溶溶我疑高原隱天漢或是陰壑蟠虬龍
又疑造物喜變幻顛倒景象潛其蹤不然水濕本就下
一泓上出夫何從嘗聞此山可度難靈區信是千年鍾
枕中秘記誰復悉異人有在何當逢

題畫二首

東風吹春著幽谷宿雨浮煙樹新沐斜橋曲徑帶流水

白日疎籬蔭濃綠
晴江隔世不隔山
百疊蒼螺墮茆屋
輸却長吟抱膝人
鎮日臨磯弄晴淥

其二

千巖拔地排青蒼
古松稷稷連重岡
岡迴嶺複得奇絕
瀑流千丈垂銀潢
盤盤細路入雲長
兩崖對起懸飛梁
雲重路僻不知處
應有仙家在深塢
夕陽變滅晚山寒
無限風煙屬倚闌

醉仙圖

長松拔地生畫寒玉泉汨汨鳴高灘世間萬事日不足
山中百年才轉轂試看騎馬傍朱門何似滄芝友麋鹿
有時高嘯度長風白雲扶醉蓬萊宿蓬萊之宮渺何許
中有儒仙自霞舉寧知城市有閒人只與仙家隔一塵
為吳心遠補石田未完小畫并次遺韻

石翁已賦白玉樓畫圖猶記荆溪遊殘縑未了人事改
百年生世真如浮補亡到我媿貂尾絕筆從前推虎頭
坐中見畫誰最愁吳翁昨日共經丘故人何處山在眼

歲月不待江空流東來無限西州感不妨十日為遲留
題黃應龍所藏巨然廬山圖

筠陽文學倦官職十年歸來四壁立探囊大笑得片紙
不啻瓊球加什襲攜來示我俾品評謂是名僧巨然筆
渙跡漓踪那辨真白閒雙印還堪識古篆依稀贛州字
先宋流傳非一日要知源委出珍藏未論誰何定名跡
墨渝紙敝神自存老筆嶙峋況超逸罔巒迤邐蒙密樹
浦淑縈紆帶村室盤盤細路繞山椒斜引魚梁更東出

途窮山盡得幽居穹宮傑構臨清渠仙邪佛邪定何處
彷彿勝境如匡廬還從文學問何如大笑謂我言非虛
自言遠遊真不俗曾見廬山真面目五老之峰披白花
晴巖萬丈時飛瀑某丘某壑皆舊遊展卷晴牕眼猶熟
祇今老倦到無由對此時時作卧遊慚余裹足不出戶
聞君此語心悠悠高懷咫尺已千里眼中殊覺欠扁舟

早起

殘更斷續天蒼蒼開門汲井夜欲央雞聲人語杳無際

落月曙色相為光臨風短髮不受握泣露碧葉微生涼
屋頭日出萬事集惜取靜境聊徜徉

蕉池積雪次張伯雨韻

空山白石漢甌洗不與時世俱凋零天星墮地更皎皎
土花蝕雨何青青千年物色本同幻前輩畫格能遺形
懷賢弔古意無極一笑醉倒雙銀瓶

謝錢孔周送蟹

窮陰欲雪天瀾瀾塞戶僵眠對書几故人知我有高懷

緘書為致佳公子淞江水涸稻畦空掃簾竭澤那求此
吾生於此頗闕情況對一尊清更旨老妻大笑異尋常
我自適情君勿止輪囷犖類高人對此若醒真俗矣
霜螯歷落久垂涎紫髓淋漓先染指誅求既已極脂膏
搜剔還應窮爪跪莫言支解本無罪正坐尊前風味美
淮陰慷慨以功烹傅奕風流緣酒死一笑題詩謝故人
坐上江山已千里

題號國夫人夜遊圖

紫塵拂轡春融融參差飛鞚驕如龍錦韉繡帶簇妖麗
絳紗玳燭圍香風春風交花光屬路後騎雍容前卻顧
中間一騎來逡巡秀眉玉頰真天人翠微垂髻被稱身
彷彿當年號與秦佳人絕代真難得安得君王不為惑
豈知尤物禍之階不獨傾城竟傾國一時喪亂已足憐
後世方誇好顏色晴牕展卷漫多情百年青史自分明
莫言畫史都無意尺素還堪鑒興廢

次韻題王山農墨梅

西湖老樹凌風霜敷英奕奕先羣芳貞姿不作兒女態
炯然冰玉生寒芒窮寒襲人膚欲裂幽人自咏孤山雪
至今秀句落人間暗香浮動黃昏月却恨無人續高韻
墨痕聊寄江南信不關素質暗緇塵剛愛鉛煤點新髻
恍疑寒影照昏釭刻畫無鹽誰濫觴逃禪已遠嗣者寡
彷彿尚記山農王山農何處骨已冷展卷令人雙目醒
何因為喚玉妃魂極目晴波湖萬頃

臘月十八日冒雨過湯子重草堂適王履吉亦在

燕談竟日因賦長句奉贈二君

窮陰約雨風淒淒短靴犂确沾豐泥草堂舊路行不迷
依然碧鳳坊之西荒庭無聊野烟合暮雲欲壓寒簷低
平生故人忽在眼升階一笑欣相攜湯君秀潤擬文犀
王郎清才釘坐梨二君真是後來秀風儀濯濯情依依
文章奕煜煥星斗意度坦蕩和天倪祥麟一角世所稀
乃肯下友同山麝顧余骀駢何所有當年豪氣騰虹霓
世間萬事不比數欲起古人相與齊區區薄劣不自知

力小負重成顛擠空然虛譽動州里漸久亦盡行如澌
邇來推與愧諸彥大似野鶴容山雞我真老大曳尾龜
公等駭躍凌雲騄已窺正的寧有失坐躡高峻何煩梯
百年文運端有屬萬里脩程方發蹄還聞問學貴忠信
非德有受終無稽彌文曼采祇自困如屋不棟車無輓
深言贈君君勿疑由來丹鳳無卑棲前賢風躅去未遠
我不足道君當躋

蘭房曲戲贈王履吉效李賀

彤雲旖旎霏祥光蘭椒沃壁含璫芳流蘇嬋嬋開洞房
晚波繡燭搖鴛鴦鴛鴦雙飛情宛轉紫帶垂螭覺螭緩
綠膏照粉玉釭斜瑤鴨融春翠雲暖海綃落枕夜何如
美人笑擲雙明珠巫雲朝歛金釵溜不恨巫雲恨花漏

春曉曲

翠塵沃日煙霏霏彤光飛上千果愚誰家高樓鎖春色
金鋪約戶蟠雙螭東風掠幌驚綃動瑤鴨蘭溫睡初重
起來臨鏡悄無言含情自理雙鶯夢夢回生怕守宮殘

捲袖移鞦獨自看燕子銜春欲飛去海棠猶自勒輕寒
簾幙垂寒朝不捲綺疏結香春較淺欲裁羅段作春衫
自爇薰爐熨金剪

春夜曲

璫雲貫月溶金波碧烟冪樹春婆婆海珠泣紅花露重
蜃脂流絳闌迤迤越羅複幙交流蘇繡襦結帶明青蛾
金壺轉刻銅龍濕漏水濺濺轆轤澀轆轤沈沈軋銀井
畫轂難淹夜愁永起看青漢不成眠不見雙星見河影

河明月淡斗橫斜通宵春思匝天涯眉端心事說不得
自調新譜按琵琶

采蓮圖

橫塘西頭春水生荷花落日照人明花深葉暗不辨人
有時葉底聞歌聲歌聲宛轉誰家女自把雙橈擊蘭渚
不愁擊渚濺紅裳水中驚起雙鴛鴦

采桑圖

茜裙青袂誰家女結伴牆東采桑去采桑日暮怕歸遲

室中箔寒蠶苦饑只愁牆下桑葉稀不知牆頭花亂飛
一春辛苦只自知百年能著幾羅衣

題沈氏所藏石田臨小米大姚江圖

長洲沈氏舊藏小米真跡成化間有假中官之勢取
之石田為追摹此圖

春雲沈空山有無眼明見此姚江圖圖窮爛漫得題字
照人百顆驪龍珠平生雅識敷文書紹興歲月仍不誣
豈知尤物能媒禍繭紙蘭亭已非故石翁信事學行人

能使邯鄲還故步憶昔儉人賄為囿黷財更假狂閹手
千里珍奇歸檢括故家舊物那容守沈氏藏茲二百年
一朝掣去心茫然誰言物聚必有散手澤相關常累歎
未能一笑付亡弓且喜百年還舊觀豈余鈍眼錯顏標
抵掌真成孫叔敖區區不獨形模似更存風骨驪黃外
一時點筆遍通神得非小米是前身從來藝事關人品
敢謂今人非古人

五月十三夜與子重履約履仁石湖行春橋看月

夕光沈山蒼靄橫行春橋東江月生長風吹波天鏡濶
白波渺渺菰蒲聲微瀾壓玉搖空明扁舟忽動江湖情
罾頭魚蝦夜可買得酒試與諸君傾山空夜久人竟醉
高歌互答漁舟驚漁舟天上来棹入滄溟去似聞漁歌
縹緲不斷出烟蘿水遠天長不知處一髮青山落鏡中
萬里橫河碧空曙人生行樂不易得賞心況有尊前客
江山如畫酒如澠相看不飲空頭白不見橋東千尺臺
吳王曾此夜銜杯懽燕不堪芳漏促西施舞罷越兵來

越兵已成功越王安在哉
鵠夷竟去不復回吳宮
越壘空復生蒼苔
千古興亡總湮滅
只有湖山未消歇
吳王去來今幾時
幾人能醉湖中月

題高房山橫軸

春雲離離浮紙膚
翠攢百疊山模糊
山空雲斷得流水
咫尺萬里開江湖
依然灌莽帶茅屋
亦復斷渚迷菰蒲
岡巒出沒互隱見
明晦陰晴日千變
平生未省識匡廬
玉削芙蓉正當面
宛轉香鑪霏紫烟
依稀夢澤分秋練

未遂扁舟夢裏遊酒醒獨展燈前卷問誰能事奪天工
前元畫史推高公已應氣槩吞北苑未合胃次饒南宮
南宮已矣北苑死百年惟有房山耳祇今遺墨已無多
牕前把卷重摩娑世間吮筆爭么麼掃滅畦徑奈爾高
公何

明妃曲

漢廷議和親佳人使絕域明妃隨例行祇謂掖庭職一
朝臨遣動天子始信深宮未曾識當日丹青亦等閒今

知不得黃金力正緣平日懷貞素非敢從前恃顏色由
來顏色不自知愛惜自是君王私君王顧妾恩何厚竟
按臣工戮延壽佳人自有命畫工何能為長信宮中長
別離當時豈亦有人欺悠悠青塚沙塵裏千載終為漢
家死紅顏命薄古云然不恨臣工沉天子

題漁隱圖四首

江南雨收春柳綠碧烟斂盡春江曲十里蒲芽斷渚香
千尺桃花春水足溪翁鎮日臨清渠坐弄長竿不為魚

太平物色不到此安知不是嚴光徒

其二

江頭夏雨十尺強晚波搖日空江涼遊魚澆瀟樂深藪
不謂人間有漁筍網得江魚不稅官自食自漁終歲歡
輸租轉賦世途惡漁家自得江湖樂

其三

漁翁老去頭如雪短笠輕蓑舟一葉百頃魚蝦足歲租
十隻鷗鵲是家業橫笛朝衝柳外風浩歌夜弄波心月

不嫌湖上有風波
世路風波今更多

其四

烟沈風緊鳴蕭瑟
江湖歲晚玄冥肅
寒塘日出曉光浮
村甕茅柴酒初熟
網得冰鱗不入城
自灑瓦盆招近局
欸乃一聲烟水長
葦深江靜燃湘竹

和楊鐵厓石湖花游曲

石湖雨歇山空濛
美人却扇歌迴風
歌聲宛轉菱花裏
鴛鴦飛來天拍水
當時仙伯醉雲門
酒痕翻汗石榴裙

遺踪無復芳塵步湖上空餘昔人墓昔人既去今人來
千載風流付一杯雪藕紫絲薦冰碗蛺蝶穿花逐歌板
夕陽剛去畫橋西一段春光屬品題傷心不見催花使
只有黃鸝啼再四無限春愁誰與箋玉奴會唱紫霞篇

新燕篇

杏花飛飛春燕來主人花下新堂開花間相見驚相識
綠樹東風捲簾入漠漠疎烟碧草齊斑斑小雨春泥濕
城中甲第連雲起畫棟朱甍春旖旎故壘能無繡幕思

多情却向茅簷底茅簷日暖繡幙寒去來只作尋常看
乃知物性無新故世人自爾分貧富我家舊宅經幾遷
僅有此屋三年前一朝差池忽在眼便覺華煥生棖椽
不嫌香土污書帙時有飛花落舞筵人言禽鳥得氣先
主人貧病何當痊人生未怕常貧賤但願年年見新燕
夜坐

幽人被酒夜不眠攬衣起坐垂堂前參差花影忽滿地
仰見明月流青天微風吹空星漠漠時有羈鴻度寥廓

美人不來更漏沈天南縹緲銀河落

題三城王畫桃花過牆枝

彤宮雨晴春婉婉妍華不隔深庭院試拈丹粉弄春韶
淡痕已破東風面醉肌暈碧曉生光脉脉閒情眉斂黃

不從畫史爭新格自有湛然宮樣粧

世謂滕王元嬰善畫蛺蝶花鳥而董

道獨以為滕王
湛然未知孰是

文氏五家集卷四